

瓊山縣志卷之二十六

人物志十二 孝義 漢 元 明

漢

初孀者舊志失其鄉貫氏族只云珠崖令前妻女也年十三繼母連大珠繫臂爲飾令死喪還漢法納珠入關者死繼母棄之其弟九歲收置鏡奩中關侯索得珠吏曰誰當坐者女意繼母所置乃進曰父不幸母已解棄妾惜而置奩中母不知也妾當坐母爭曰此珠繫妾臂妾不忍棄何與於女妾當坐皆痛哭哀動路人關吏感其義並不忍加罪後訊實乃知九歲男所爲遂之

釋

元

蔡九孃千戶克憲女有姿色解書義多勇畧年十

一喪父擇配越三十不嫁

雞肋集云父亡弟幼不欲以黎土屬之他

人故親統父兵俟弟之壯不肯適人

元末寇亂統父兵保障鄉里未幾陳子珙陷乾

寧郡邑九孃固守不下日久力竭泣謝鄉人曰

賊帥新得郡城不守而來爲我也我死則禍息

矣乃投入鋪錦巖避焉子珙怒以草塞巖口縱

火熏之九孃死巖中子珙詩云一笑花前醉似

泥綺筵歡劇不聞雞馬蹄到此空歸去不是花

迷是酒迷爲九孃作也

明

陳氏東廂人唐舟之子庸妻家居淡薄陳奉甘旨
未嘗缺姑病危晝夜侍側廢寢食焚香祝天剖
股和藥以進人無知者姑食之病愈久乃覺人
莫不歎其孝

馮氏名銀字汝白東廂人唐舟之孫繼祖妻同邑
教諭源女奉姑孝亦嘗剖股療病云

林氏增生陳輔妻年二十寡紡織鞠孤遭海寇許
瑞遍焚村落漸迫氏家冒火僱人救出夫棺與
家人避賊渡河舟溺又奮命援其妹得俱免人
稱天佑守貞課子壽七十八

林氏儒士陳鑿妻

通志作陳鞏

年二十八寡孝敬翁姑

拮据課子母憐其困苦勸以他適氏持刀刺臂矢節姑病焚香拜禱願減己壽以益親齡子紹

文遊泮

邱氏貢生崢之女性至孝以父無嗣不肯字人隨

父任廣西思恩縣訓導父歿女爲殯殮扶柩而

歸卒於徐聞年三十八有司旌之曰孝女垂芳

吳義姑前所人辛卯舉人李明妻俊之妹明卒吳

年二十四無子歸母家撫孤姪誠如己子教育

成名領正德己卯鄉薦卒誠服喪三年

王氏烈樓川宏女以父無子不忍出嫁矢志守貞

與父相依爲命終養三十餘年父卒哀毀骨立
人勸之嫁不應終以哀毀亡族人憫其孝烈醵
錢置田立碑並父墓祭

人物志

死節

唐

元

明

清

唐

王英符鳳妻亡其姓寶祐間鳳以罪徙儋州至海南爲獠賊所殺脅王英私之英紿曰一婦人安能事衆男子請推一長者賊以爲信乃請更衣有頃盛服立舟上曰受賊辱不如死遂沉於海

元

蔡氏疊村蔡九孃之妹遵都王和妻至正壬寅賊陳子瑚黨邱田欲犯之不屈自縊死

唐五妹伯壽女至正甲辰陳子瑚寇乾寧郡與從妹俱被執至舟中躡其妹曰我必不免於辱縱

還何顏立於世乎汝小尙可求生也乃紿賊曰

妾家破親亡將何之乞解縛當相從賊然之卽

投江死時年十八從妹以幼得歸

上俱舊志

韓氏文昌縣石康韓元帥女烈樓王天傳妻幼聰

慧通女戒元季繹騷夫死于寇韓贖以塋命子

翰避寇海北冀延宗祀己以死守後爲寇迫不

辱死賊義之不入其里里人賴存者多厥後子

脫難歸延祀王門不絕如綫韓之力也

採訪

明

程氏賈岳妻洛國後海南衛前所鎮撫凱之女洪

武丁丑年二十二歲夫歿自縊事聞旌表

解學士縉

傳曰賈岳妻程氏之女也粗涉書傳有德容年十八嫁爲岳妻岳父羽初爲海南衛鎮撫謫廣西岳涉嶺海省之得疾後歸瓊州方疾亟時程氏許從死神傷不能哭遂自縊生與岳同年氏年二十二歿時洪武丁丑也一子鞠於祖父母中舍人吳君仲平贊曰慷慨殺身易從容就義難人於所當死亦有迫於勢不能不死者若程氏其何迫之有所以爲難也然瓊在海外而民皆知慕其義至指其塚嘆惜之嗚呼亦足以見風化之大行與

畢氏直隸太湖人年十五嫁南昌衛指揮屠經爲側室宣德初經以累謫海南衛千戶病劇訣別畢誓同死經卒旣殮乃沐浴更衣辭其姑姑難其請相抱痛泣俟衆防少懈閉戶自縊

耿氏歸金用和爲妻未三月金渡河遇颶訛言溺死耿聞卽自經氣絕而金適歸有名醫徐美救

之甦耿性慧閑談論古今咸有典據金或不知也及金羅禍耿避難役得而昇之耿曰昔王凝之妻爲逆族主人所持卽斷其臂今吾以目視惡人可乎不如死之爲愈也卽瞑目不食數日役懼昇還其家尋卒

陳氏知陞川縣張子翼妻隨翼任嘉靖甲子翼入省闈僣徭賊數千劫庫擄氏爲質云順我則生否則死罵賊咬賊手內啗之賊怒刃死越三日顏色不變救兵至賊退陸人爲具棺殮翼卽葬之於陸時年三十兩院旌表立祠春秋致祭後以子紹初官贈安人

韓氏謝應昇妻居文昌水瀾村年二十被海寇曾一本擄去時抱男乙常在手俄見母陳氏亦被擄韓乃給賊曰若放我母與子歸當從女賊信而釋之韓度母子去遠遂投海死數日其兄夢韓執蓋行海濱因至其地求之果得屍於破傘下面色如生乃收葬焉

陶氏海南衛軍許撫謙妻隆慶六年倭陷海口城被執不辱死

陶金孃舜卿女隆慶六年女年十六賊陷海口城獲女美其色欲污之女唾賊大罵以死自誓賊多殺人以懼女意強必從竟不辱爲賊所殺

清

李氏戍婦也夫王尙策山東德平人犯罪戍瓊康熙五年八月病故氏年三十一預治殮具爲身殉計至十一月十八日自縊而死附祀

吳氏大小英人庠生理燦之女適康熙壬子舉人王賓賓會試卒於京邸吳聞訃痛激投繯

趙氏李捷魁妻年十五歸魁康熙辛酉海黎肆掠趙逃匿山中賊搜山得而脅之不從刀血遍體一賊曰是烈婦也不宜枉殺一賊復至又脅之趙罵不絕口賊怒以刀刺其喉幾斷越三日有自賊中逃回者言其事甚悉捷魁乃往山中昇

歸奄奄一息尋卒

屈氏澄邁人夫失姓名居海口所康熙二十年海賊楊二破城逼氏去氏罵賊被斷其手足而死前府嘉其貞烈爲立木主附江公祠祀之

尹氏海口水師左營守備黃世賢妻康熙二十年海賊楊二圍海口城城中危急氏慮城破被辱先吞藥死前府爲立木主附祀於江公祠

楊氏晉江張元璐側室僑寓瓊郡賊封坊璐亡氏年二十有聞人劓委佐郡者欲脅娶之誓死不許值璐七辰理粧哭拜閉戶自經顏色不變縉紳士人咸往拜奠與璐合塋於新學左附祀

吳氏林發桂妻孀居撫稚子爲海寇所擄恐被污
密囑同難者曰吾不復得見吾兒矣若等得歸
當爲吾兄告之卽投水死

王氏官隆三人天文女年十四贅林學文明年學
文死慟絕者再乃衰經登林門哭泣拜見翁姑
矢志堅守踰年有匪徒周加令窺氏姿色托媒
結婚氏不允乃強委禽焉聲言擇吉迎娶氏卽
閉門自縊十一月部院王 諭王氏芳齡失偶
誓不再醮因強徒逼脅甘死以明從一之義志
節可風給芳性天成四字製匾以勵風俗乾隆
九年旌祀節孝祠 俱舊志

顏氏徐必奇妻康熙年間爲海寇所掠顏恐被污婉詞誑誘爲全身計旣而佯汲水卽投江中漁人救之不死擁至徐家必奇不知妻志疑爲賊玷顏卽引刀自割其乳而死神色自如觀者無不駭焉

朱氏萬都一人王邦榮妻年二十七生男正錦三歲而寡欲以身殉旁人勸以翁老兒少而止遂携弱弟孤兒勞兼內外恢復前產翁卒殮塋如禮未幾錦又染痘醫者以危在三日外先二日遍辭親戚矢從丈夫於地下不忍視兒沒親戚來寬慰者衣服各付予產業付其弟衆知其必死繫防之夜偶疎竟投水死

吳氏白沙人主簿以松女配府經歷陳元粹子德浴
爲妻年十七歸浴伉儷甚篤事翁姑無忤色年二
十七浴病篤侍湯藥時刻不離浴故氏視殮畢卽
從容理裝仰藥以殉

上俱採訪

王氏郡東門內街拔貢馮耿光續妻東周巷王廷侑
女年十八于歸孝事姑和妯娌婦道無虧及耿光
由都旋病故氏以同穴自誓慟哭哀毀水漿不入
口次日視殮畢從容就義遽以身殉鄰里以烈婦
稱之

鄭貞烈女下田村少許字邕陽吳家年十六性靜有
姿色父櫛負販爲業續母王氏嘗虐使之女惟命